



國家清史編纂委員會・文獻叢刊

六編

清代稿鈔本

第三八六冊

國家清史編纂委員會・文獻叢刊

六編

清代稿鈔本

第二八六冊

廣東省立中山圖書館
中山大學圖書館

編

主編 桑兵
副主編 李昭醇 程煥文 劉洪輝

SPM

南方出版傳媒
廣東人民出版社

・廣州・

第二八六冊目錄

京報摘鈔

京報摘鈔

不分卷

光緒五年三月至光緒五年十二月

佚名輯

鈔本

光緒五年三月初一日京報

署都察院左都御史臣全慶等跪

奏為奏

聞請

旨事據湖北

民人李心恭以衿痞結黨畏控謀逼等詞赴臣衙門呈遞臣等公同訊問據李心恭供年三十四歲湖北南漳縣民人竊身伯父生員李天永訓讀為業安分守己因在縣肄業不料家被張么竊去衣物錢文隣人張玉發目覩信知身伯指控捕署將么拿案尚未提訊詎伊族兄劣生張理純曾因架訟斥革仍復武斷一鄉與慣賊張么狼狽為奸借端撞詐偷竊分贓已非一日拿到張么時適縣主陳邀請張理純弟兄理孚理成理安等在署宴散驚聞此事恐供出消贓等情理純率眾蜂擁捕署欺官藐法將么抓走怒猶不息聲言未與伊等說知輒敢具控拖毆身伯凌辱不堪幸街隣舉人金宗培撞見正言

斥散身伯抱忿迫書冤狀欲再申訴五月初一夜間理純帶領數人
掣身伯出寓多時未返身叔天秩同在寓眼見至次早聞身伯死於
城隍廟內理純私入縣衙移時始出隨串住持僧佛青報案移屍城
外並不傳屍親到場遽行相驗身聞叔天秩遣人送信一炊時奔城
見伯屍僵城邊頸項繩痕二道一痕交轉色紫一痕未交色白勒斃
情形顯然並詢悉拖毆掣寓各節初三日稟請縣主覆驗究辦純賄
通縣主批稱自縊身死身不勝駭異身伯如果自縊何有二道繩痕
且身旁搜出冤狀留縣不發身續控仍置不理迫叩各上憲均批縣
覆驗詳辦身同父天鍾投案縣主怒因上控將身父管押並不提純
對質純用銀二百兩賄通書役門丁捏造詳文稟稱身伯誣良為盜
畏罪自縊伏思張么未及堂訊即被抓走竊情虛實何能遽定何罪

可畏即使誣一小偷例有明條身伯忝列膠庠豈概不知罪之輕重而遽肯捐生畏罪自盡乃係一面之詞身伯冤狀及身控情為何不詳不錄種種破綻難以枚舉無非錢可通神暗無天日為此奔京瀝訴等語餘與原呈大略相同臣等查該民李心恭控稱伊伯父生員李天永被張么竊去衣錢等物稟經捕署拿獲方生張理純等袒庇族匪率眾劫去復將李天永毆辱掣出次日身死廟內串僧報案移屍頸項有繩痕二道該縣因受囑託未傳屍親到場遽行相驗捏詳畏罪自縊並因上控怒將該民父管押不容對質各情控關謀斃移屍賄串捏詳亟宜嚴切根究以懲豪惡而重民命謹抄錄原呈恭呈御覽伏乞 聖鑒訓示再據民人結稱在本府本道各控告二次臬司巡撫衙門各控告一次未^均親提合併聲明謹 奏光緒五年二

月十一日奉 旨此案著交李瀚章潘霨督同臬司親提人証卷宗
東公研訊確情按律定擬具奏原告民人李心恭該部照例解往備
質欽此

頭品頂戴湖廣總督臣李瀚章湖北巡撫臣潘霨跪 奏為審明京
控案件恭摺具陳仰祈 聖鑒事竊照前准都察院咨據湖北南漳
縣民人李心恭以衿痞結黨畏控謀逼等詞赴京呈控訊供取結奏
奉 諭旨此案著交李瀚章潘霨督同臬司親提人証卷宗東公嚴
訊確情按律定擬具奏原告民人李心恭該部照例解往備質欽此
並將李心恭咨解回楚遵即行司委提人証卷宗來省審辦去後茲
據湖北按察使姚覲元審明議擬詳解前來臣等親提人証督同臬

司逐加研訊緣李心恭係南漳縣人住居鄉間有胞伯李天永向在城內開館訓蒙與張么即張理倫鄰近素識光緒四年三月十七日李天永將狐皮襖青布馬褂圍袴各一件鞋襪各一雙棉被二牀銅壺一柄託李祥泰寄存危太興鋪內未經取回四月十一日張么與李天永因事口角而散詎李天永因此挾嫌遂於是月二十六日將寄存危太興鋪內衣物捏為失賊指稱被張么竊去並將查無其人之張玉發列作見証開具失單赴典史衙門稟報轉申到縣經張么之胞兄張理成聞知即以李天永挾嫌誣告等詞赴縣代弟具訴該縣差傳質審李天永慮恐到案審明作証自書遺單內載恐玷斯文雖生無面見人倘蒙同學能代伸冤九泉感恩字樣收藏在身於五月初一日夜潛赴城隍廟側屋門枋上自縊殞命初二日早廟僧

佛青見而解救無及報縣傳同李天永之族弟李天秩至廟查勘驗
明李天永咽喉上有繩痕二道一道繞項周匝一道八字不交均紫
赤色十指吐血墜肚腹下墜實係自縊身死取其李天秩眼同相驗
甘結連起獲屍身所藏遺單一併附卷填格詳報李天秩先經倩人
至鄉送信正值李天永胞弟李天中患病李心恭出外貿易迨李天
中病愈李心恭外歸同至縣城找尋李天秩未遇因聞傳述訛言李
天永被竊衣物報經典史拿獲正賊張么被張么之族人張理純等
蜂擁捕者抓走並將李天永拖毆凌辱李天永迫書冤狀欲訴至
五月初一日夜人被張理純帶人掣喊出寓死於縣城隍廟內隨
串廟僧佛青報案移屍城外等語信以為實李天中赴縣具呈請驗
該縣以李天永屍已驗明委係自縊身死毋庸覆驗批飭傳証審辦

李天中見縣批與傳言不符心疑縣驗不實迭赴府道司院各衙門呈控均批行該縣確審究詳李心恭以案未集訊愈疑李天永抱冤難伸一時痛伯情切起意京控先向其父李天中告知隨照李天永報竊呈稿將所聞傳言捏稱親見並牽砌縣差丁書受賄各節希圖聳聽作就呈詞攜帶起程五年二月初一日李天中會晤李祥泰告知李天永生前曾將衣物託伊寄存危太興舖內李天中令其次子李心閑取回衣物認明即係李天永報竊單開各賊又查明李天永所書遺單並非訴縣冤狀始知李天永本未被竊實因誣良畏罪愧悔自盡復遇李天秩述明眼同相驗情形前疑俱釋惟時李心恭抵京赴都察院衙門遞呈訊取供結奏奉 諭旨交審咨解回楚遵即行司委提人証奏宗來省審辦茲據臬司審明議擬詳解前來臣等

親訊無異應即議結此案李天永挾嫌誣告張么行竊慮恐審虛生
誣自書遺單投緹殞命前經該縣眼同李天永族弟李天秩驗明委
係自縊身死現復提齊人証研訊僉供實由畏罪輕生與人無尤應
毋庸議屍弟李天中上控屍姪李心恭京控雖俱失實訊係誤聞傳
言懷疑具呈並非有心誣告惟李心恭京控呈詞內輒將耳聞訛傳
捏稱親見希圖聳聽究屬不合應照不應重律杖八十折責發落李
天中請免置議張么即張理倫訊無行竊情事應與並無夥同書受
賄捏詳之縣差胡玉秀等及未聽囑移屍之僧佛青暨訊屬無干之
張理純等均毋庸議未到人証免提省累除供招送部外所有審明
議擬緣由謹合詞恭摺具 奏伏乞 皇太后 皇上聖鑒勅部核
覆施行謹 奏軍機大臣奉 旨刑部議奏欽此

光緒五年三月初二日京報

奏請 飭各省州縣傳案按程途遠近限定日期摺

江南道監察御史臣鄭溥元跪 奏為各省州縣傳案宜按程途遠近限定日期不宜縱役稽壓恭摺具陳仰祈 聖鑒事竊惟黎庶之冤收民者必代為之雪吏胥之弊收民者尤當密為之防彼刁民以健訟為能固宜嚴懲而氓之蚩蚩被人欺壓或憑空牽連非牧民者速為洗刷天下奚以無冤民乎乃臣聞訟詞批准該役爭向門丁購票若聞訟主稍富則不惜重價且或捏增案外之人以拖累無辜牧民者苟尅期速訊民猶可伸其冤也無差役私押索費得遂其欲則代求門丁袒庇不遂則任意凌辱甚或私用刑具一旦門丁催促該役輒以訟主受病或以被告私逃為辭試思受病與私逃者固所難免而未曾受病私逃者何亦日久稽壓無他未定限期故耳夫各省

之情形不同事之重輕與路之遠邇亦各不同要之飭役傳案均不得任其遷延致滋流弊臣擬請 諭令刑部申議章程刊頒各省督撫按照路途遠近限定傳案呈堂日期俾州縣於開印時先帖示閭閻聽訟時先詢兩造如有私押索賄及捏傳案外之人等弊卽先重責該役至於判定曲直扶弱抑強更不容胥役門丁互相置喙庶弊竇可以塞而民之冤亦可以洗矣臣愚昧之見是否有當恭摺具陳伏乞 皇太后 皇上聖鑒謹 奏光緒五年二月十二日奉 上諭御史鄭溥元奏請飭各省州縣傳案按程途遠近限定日期一摺着刑部議奏欽此

光緒五年三月初二日京報

臣恩承臣童華跪 奏為已革大員供詞狡展例得奏明請 旨遵
行並請 飭將玩誤公事之地方官議處恭摺奏 聞事竊臣等於
光緒四年十月二十九日行至山西平定州途次接准軍機大臣密
寄光緒四年十月二十六日奉 上諭四川東鄉一案丁寶楨李宗
義所奏情節不符着恩承童華即將此案詳細查訊秉公議結據實
具奏務使水落石出情真罪當不得稍含混摺片呈詞均着抄給閱
看將此各密諭知之欽此遵 旨寄信前來臣等查辦理案件何憑
供證以定罪名此案關係綦重詳閱全案卷宗起事之情由辦理之
始末其時往來文札稟報信函反覆推求案情畢現加以該督丁寶
楨明查暗訪委員李傳駿等稟覆情形藩司程豫臬司方濬頤等詳

文稟稿厯厯可考如果援為證據不無確切可憑之處即使不取具供詞亦不難據情定讞惟何來辦案多係訊取確供洵如該督丁寶楨所奏據供定案自是一定之理乃卷查該督丁寶楨定案時係僅據該革員李有恆一面之詞其於委員李傳駿等查訪稟詞並藩臬兩司詳稟之外率參臆斷遽定爰書臣等詳核此案原委衡情酌理碍難憑該督丁寶楨所取原供率為辦理不得不提該革員等確切審訊無如該革員等異常狡展忽認忽翻臣等竊思已革提督李有恆已革記名提督發往新疆未起解之劉道宗已革總兵發往軍臺未起解之雷玉春等曾任大員似宜與平民示有區別督飭司員虛衷研鞫未便急聲厲色遽矢刑威以冀稍存體制詎該革員等迭經再三開導自知理屈詞窮輒不肯俯首認罪強詞狡辯固執如前一